

08/08/1997

(Kalau kail panjang sejengkal)

Mzali

SALAM Joran.

Isnin lalu, penghuni Kuala Lumpur terutamanya di Jalan Bukit Bintang pasti tersentak mendengar kritikan Perdana Menteri, Datuk Seri Dr Mahathir Mohamad, mengenai kekotoran di kawasan itu.

"Macam hutan". Begitulah antara kata-kata yang dirumuskan Perdana Menteri ketika dalam perjalanan ke Lot 10 (kompleks beli-belah).

Saya tak terperanjat dengan kata-kata Dr Mahathir itu kerana sudah acap kali melihat keadaan kotor yang jauh lebih hebat daripada di Jalan Bukit Bintang.

Itu di darat. Tak tahulah apa yang akan diperkatakan Perdana Menteri jika beliau melihat Sungai Klang dan beberapa sungai lain termasuk di Taman Negara. Mungkin macam tong sampah atau tempat pelupusan sampah!

Kaki pancing tentulah mahu pancing ikan. Tetapi yang tersangkut pada mata kail ialah tin sardin, botol kicap, botol sos, lampin pakai buang, tin biskut, beg plastik dan macam-macam lagi. Itu pun kira bernasib baik. Kalau nasib kurang baik dapat bangkai lembu dan kambing yang dah membusung dan berulat. Cukup jijik!

Jika Dr Mahathir berang dengan keadaan di darat, usah terperanjat dengan suasana di sungai atau tepi laut. Apabila hujan, air akan membawa segala sampah sarap ke sungai dan laut. Jadi, sampah sarap yang bertimbun-timbun di darat akan memenuhi ruang di sungai. Ini yang menyebabkan sungai-sungai kita (terutama di bandar-bandar besar) penuh sampah sarap. Lebih sampah daripada ikan.

Sudah acap kali kita mendengar saranan dan amaran mengenai amalan menjaga kebersihan sungai, tapi sehingga kini ia tidak meninggalkan kesan. Segala akta dan peraturan, sama ada yang dikeluarkan Jabatan Pengairan dan Saliran, Jabatan Perikanan dan Lembaga Kemajuan Ikan Malaysia, tidak akan bermakna jika penguatkuasaan tidak dilakukan.

Namun lebih penting ialah soal sikap. Oleh itu, marilah kita menjadi pemancing berhemah, yang memastikan sungai, laut dan tasik yang sering kita kunjungi sentiasa bersih, tidak tercemar dan bebas daripada sampah.

Selamat memancing.

(END)